



31. marts 2023

UPA 2023/150

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Tusagassiortut kalaallisut oqaluttunik amigaateqarneq qanoq iliuseqarfigisinnaanerlutigu Oqallisissiatut siunnersuut.

(Inatsisartunut Ilaasortaq Nivi Olsen, Demokraatit)

Tunngavilersuut

Nunatsinni demokrati aqqani pitsaasumik tunngavilersorluartunillu tusagassiortoqarnissaq pingaaruteqarpoq. Innuttaasut tusarlerneqarnissaannut paasissutissiivigineqarnissaannullu, aammalu pissaanilinniit aaliangersimaneerit immikkut sammineqarnissaannut tusagassiortut tusagassiivillu qulakkeerinnittussaapput. Taamaasillutik tusagassiortut demokratimut isumalerujussuupput.

Taamaattumik demokratiskiusumik ingerlaniarnitsinni ajornartorsiuteqarpugut, nuna tamakkerlugu tusagassiorfeqarfipput KNR kalaallisut oqaluttunik sulilersitsiniarnini paarinninniarninilu unammillernartimmagu. Inissisimaffik Naalakkersuisut pimoorunneralugu tiguseriaqarpaat.

KNR tusagassiortunik amigaateqarneq pissutigalugu tusagassiisarnimi amerlassusaanik ikilisaareersorlu tusagassiivik Journalisten juni 2022-mi ajornartorsiut qaqippaa. Taamani Ilinniartitaanermut, Kultureqarnermut, Timersornermut Ilageeqarnermullu Naalakkersuisoq KNR siunissaanik ilusilersuisussamik suleqatigiissitamik pilersitsisoqarnissaa neriorsuutigaa¹.

Neriorsuut tamanna Ilinniartitaanermut, Kultureqarnermut, Timersornermut Ilageeqarnermullu Naalakkersuisoq piviusunngortissinnaasimanngilaa, maanna qaammatit arfineq sisamat igerlareersimalerput sulilu pilersinneqarani².

Tusagassiinermut sulisut peqatigiiffiata unammillernartumiinneq eqqummaariffigaat Naalakkersuisullu oqaaseqarnissaat sorsuutigalugu. Februar 2023-mi Ilinniartitaanermut, Kultureqarnermut, Timersornermut Ilageeqarnermullu Naalakkersuisoq ammasunik allakkiorfigineqarpoq, ajornartorsiutillu sakkortuumik tikkuarneqarlutik³.

Soorlu innuttaasut pillugit Naalakkersuisut nassuiaateqarnissartik soqutigissagaluaaraat, kisiannili taamaangilaq. Maannakkut Naalakkersuisuusut ajoraluartumik oqaluttuarisaanermi aatsaat taamak matoqqatigisumik ingerlatsileruttorput. Soorlu tassa Naalakkersuisut innuttaasunut paasissutissiinissartik peqataatitsinissartillu kissaatiginngikkaat. Unalu sammisaq pineqarnerani taamaappoq, KNR arlaleriartumik

¹ "Dårlig løn tvinger Grønlands public service-kanal til at skære i nyheder" - ilanngutassiaq journalisten.dk 23. juni 2022

² "Neriorsuuteqarnerminiit qaammatit qulingiluat kingorna: KNR-imut sulisuleqatigiissitaliunngitsoq", ilanngutassiaq KNR.gl 6. marts 2023

³ "Tusagassiinermi sulisut peqatigiiffiata KNR ernumassutigaa: Politikikkut iluarsisutaasinnaasunik nassaarniartoqartariaqalerpoq" ilanngutassiaq KNR.gl 28. februar 2023



nalunaarutigisariaqarsimammagu Ilinniartitaanermut, Kultureqarnermut, Timersornermut
Ilageeqarnermullu Naalakkersuisoq KNR-mut oqaloqateqarnissaminik piffissaqarsimasanngimmat.

Iluamilli; tamanna ajorpallaaqaaq. Qaammatit arfineq sisamat neriorsuutigisimasamik suleqatigiissitamik
pilersitsisinnaasimanngikkaanni suna peqqutaanersoq tamanut nassuiaanissaq
pisussaaffigineqartariaqarualarpoq. Kisiannili Ilinniartitaanermut, Kultureqarnermut, Timersornermut
Ilageeqarnermullu Naalakkersuisoq nipaqaanngivippoq.

Naalakkersuisuniit demokrati-skiusumik ingerlatsinissamut pikkorluppallaarneq tamanna tusagassiortunik
kalaallisut oqaaeqartuusunik pissarsiniarnermut ajornartorsiorneq akiornissaanut iluaqutaanaviannigilaq.

Qanorluunniit ikkaluarpat aaqqiissutissamik ujarleqatigiittariaqarpugut. Unammillernartunut ilaasutut
erserpoq akissarsiaqartitsineq. KNR-mi tusagassiortutut akissarsiat toqqaannartumik unamilertimiit
Sermitsiaq.AG appasinnerungaarpoq, kisiannili aamma pisortani namminersorlunilu suliffeqarfiuteqartuni
paasissutissiinermut aammalu attaveqaaqatigiinnermut atorfinniit appasinneruvoq. Taakku
tunngavigiinnarlugit paasinarpoq sooq KNR tusagassiortunit toqqarumaneqanngitsoq. Kisiannili akissarsiat
kisimik unammillernartunut tunngavigineqartarunanngillat.

Naluarput; immaqa KNR-mi sullivimmi avatangiisit pitsaanngitsut? Immaqa aqutsinerlunneq? Akunnerit
sullivigineqartussat ajornakusoortut? Ilinniartitaanermut, Kultureqarnermut, Timersornermut
Ilageeqarnermullu Naalakkersuisoq neriorsuinikuuneratuut suleqatigiissitamik pilersitsinissaminik
qaammatit arfineq siamat qaangiuttooqqammat naluarput. Tamanna ajorpoq.

Arlalitsigut aaqqiissuteqassasugut Demokraatiniit isumaqarpugut.

Piffissaq qaninneq eqqarsaatigalugu KNR akissarsiatigut aammalu KNR-mi sullivinni atugassarititaasunut
isumaqatiginninniarluarsinnaanissamut periarfissagissaarnissaa qulakkeerneqartariaqarpoq,
sulisoqarniarnikkut pissutsinut sanillersuussinnaanngorneraluni isumaqatiginninniarsinnaanissaa
periarfissagissaartinnerulerlugu.

Suleqatigiissitamik pilersitsinissamik Ilinniartitaanermut, Kultureqarnermut, Timersornermut
Ilageeqarnermullu Naalakkersuisoq neriorsuisimanera piviusunngortinnissaanik peqquneqaqqissooq,
unammillernartut ersarissarneqarnissaat pisariaqartipparput.

Piffissaq ungasinnerusoq eqqarsaatigalugu tusagassiortungorniarluni ilinniagaq inuusuttatsinnut
soqutiginaruunissaa sulissutigisariaqarparput. Tusagassiortutut kalaallisut oqaluttuulluni
suliffissaqarnissamut qulakkeeriniffioreerpoq, tamannalu avammut nittarsaannerusariaqarparput
amerlanerillu ilinniakkamik tiguserusulersillugit.

Maani Inatsisartuni Naalakkersuisut partiillu sammisamut qanoq isumaqarnersut tusassallugit
qilanaaraagut.